

梅月堂集

三

卷之四夢

晝夜

月

雨雪

風雲

山岳

江河

樓閣

亭榭

園林卷之五

燕飲

菓實

書畫

文章

文房

器用

燈燭

食物

酒

禽

數

虫

魚

竹

木

花草

梅月堂詩集卷之四

夢

夢中作

一  
山  
間茅屋雨蕭蕭  
春半如秋意寂寥  
俗客不來  
山鳥語箇中清味倩誰描

晝夜

靜夜

三  
更  
耿不寐  
明月滿東窗  
杜口傳摩詰  
無心學  
老龐  
最憐清似水  
安得筆如杠  
剪燭拈新語  
排  
聯押韻雙



夜深

夜深山室月明初靜坐挑燈讀隱書虎豹亡曹  
相怒吼鷗梟失伴競呵呼願生爭似安吾分却  
老無如避世居欲學鍊丹神妙術請來泉石學  
慵踈

寓夜

草根咽咽亂鳴蛩喜聽興天寺裏鍾寥落客窻  
誰是伴一眉新月掛庭松

月夜獨步庭中

滿身風露正淒淒夜半鍾殘斗已西松鶴有機



和月唳草虫牽恨向人啼半窻孤枕燈花落幽  
樹一庭簾影低侍者正眠呼不起好詩吟了便  
旋題

晝靜

晝靜渾無事萱花日影遲蜂喧衙退後蟻散戰  
酣時筠簟冰人冷風爐火獸歌溼南薰一炷高  
卧傲皇羲

晝景

天際彤雲晝不收寒溪無響草莖柔人間六月  
多忙熱誰信山中枕碧流

畫意

庭花陰轉日如年一枕清風直萬錢  
人世幾回蕉廡夢想應不到林川

月

缺月上東山

三更缺月上東山星斗初橫玉露溥  
最好夜深無夢寐碧梧桐影上欄干

月色

長空月色正嬋娟歌枕夜涼人未眠  
何處斷腸江上笛一聲吹破碧雲天



倚欄待月月上喜題

崢嶸秋暮倚闌干待月東峯仔細看山吐二更  
千里共風添半夜十分寒庭軒索寞松濤壯巖  
竇淒涼鶴夢殘坐久猶吟仍不寐銀河清淺露  
溥溥

月夜偶題

滿庭秋月白森森人靜孤燈夜已深風淡霜清  
不成夢紙窗簾影動禪心

山中秋夜月色如海照我床簾可喜也  
長空無雲天色晶銀河淡淡西南傾白玉之盤



輶大清仙桂婆娑鏗然鳴天風掃却蝦蟆精星  
斗收芒烏鵲驚廣寒殿前霜氣橫玉兔擣盡磨  
雲英我欲長歌階下行月亦徘徊來照傍妍妍  
千里作長檠幾見人間相代更紛紛塵土糝交  
爭爾獨無心隨慶明我欲與爾結寒盟天上人  
間應難并年年秋夜白玉京分光長照青山楹

中秋夜新月二首

半輪新月上林梢山寺昏鐘第一敲清影漸移  
風露下一庭涼氣透窻凹

白露漙漙秋月娟夜虫唧唧近床前如何撼我

閑田地起讀九辯詞一篇

月夜

絡緯織床下月白清夜永靈臺淡如水萬像森  
復靜風動鳥搖夢露滴鶴竦警物累不相侵箇  
是招提境

中秋與好古翫月

中秋月色正嬋娟偏照東南左界天漢苑秦宮  
開鏡匣吳江楚水映漁船玉壺初展三清水丹  
桂重開午夜前今日與君相對看滿窻寒影愛  
無眠



皓魄當天洗玉盆，秋聲搖落桂花繁。  
雲收鰲背三千丈，人倚瓊樓第幾軒。  
露浥階莎蛩語穩，風搖庭樹葉聲煩。  
諸君且住探清興，須餞冰輪墜短垣。

海月

年年海月上東陬，來我床前遣我愁。  
萬里更無纖翳隔，一天渾是玉壺秋。  
秦宮漢苑人橫笛，楚水吳江客艤舟。  
離合悲歡應共伴，停杯且莫問從由。

四月十四日夜月



中庭蘿月白森森穿我東窻照我琴莫道姮娥  
常獨宿年年伴得幾人心

笑太白

太白出東方睽睽配殘月來照我衣裳不能明  
且潔廉纖礙微雲光芒欲發越汝能並兩耀幹  
運擅予奪須臾大陽明嘒彼無蹤滅

雨雪

雨後

雨過虛簷納晚涼淒淒風露襲衣裳蟬藏葉底  
聲猶澁虹插溪心影有芒詩瘦從來因病得離

情多為故人忙生涯點檢無拘束一鼎新茶一炷香

喜晴

昨夜屢陰晴今朝喜見日陰陰夏木長嘒嘒鳴  
寒蜃樹有櫟與檇穀有稗與糲世我皆相違年  
來添白髮開襟納新涼清風轉颼颼

虹銷雨霽

晚來雨新霽彩虹銷天衢霞彩展空碧山光如  
畫圖新涼入庭樹微風撼我幙晒彼堂下蘭紛  
披荆棘間馨香愈馥馥援琴時一彈嗟嗟世險



噦嘿嘿情鮮歡入門不自聊出門誰與寬浩歌  
復嗚呼缺月昇雲端

風雨

陰曠晝晦冥蟄龍西南驚雨點橫天落大風揚  
沙礫黑雲如潑墨砲車展寥廓列缺明戶牖霹  
靂焦巖樹大塊一何壯上帝方震怒警爾黔黎  
徒無然或泄泄人人敬爾身庶可天威霽

久雨

茅簷連日雨且喜滴庭除底事消清晝窮愁著

隱書



秋雨書懷

一庭秋雨占黃昏  
靜坐無聊獨掩門  
階短亂蛩依細草  
簷深宿鳥聚頽垣  
一窻紙濕青燈小  
幾樹風踈紅葉翻  
屈指十年遊歷處  
暮雲煙樹宿江村

秋雨

草堂踈雨滴梧桐  
葉落空山昨夜風  
歸鴈有聲來小枕  
怨蛩多語泣寒叢  
一庭苔色斑成暈  
萬樹秋光冷欲空  
野水灌河添淡碧  
老龍湫下亂西東

九月二十日雪

霜未專威雪已灑長空六出正飄飄  
雖然落地無蹤跡一任西風著便消

晴後復雨

東江秋水水平南浦雲蒼蒼  
雨脚似銀竹滌暑生新涼  
蟬癡葉底藏燕點簷際翔  
遣寂倚軒窻巖溜聲浪浪

霽後

雨後山容碧風來樹影涼  
晚雲籠細草殘照翳踈篁  
慵懶偏宜睡衰遲恰似狂  
烏床拈小筆要



寫鍊丹方

雨中悶極

連空細雨織如絲，獨坐寥寥有所思。  
窮達縱云天賦與，行藏只在我先知。  
霏霏麥隴秋聲急，漠漠稻田晚色遲。  
老大願生何事好，竹床涼簟乍支頤。

踈雨

踈雨蕭蕭閉院門，野棠花落擁籬根。  
無端一夜芝莖長，溪上清風屬綺園。

雨中示善行



窮廬與汝兩相依寂寂茅茨獨掩扉  
藤蔓覆梨張綠暗藥苗冒雨折紅肥  
惟思末路身無病却喜平生首不  
鞿魚鳥亦知吾所樂林泉終日自  
忘機

梅雨

梅欲黃時雨欲迷  
雙雙雛燕接新泥  
琴絃已作薰風語  
低和松泉細入詩

小雨

天街小雨洒紛紛  
半作清煙半作雲  
獨掩柴關人正靜  
一聲泥滑隔山聞

雨晴

濃雲簇簇展西東  
檉葉初翻昨夜風  
十里江山明似畫  
一雙白鷺下青空

雪夜

紛紛飛雪洒寒簷  
月色薰窻映細簾  
地爐火燒炕予暖  
擁衾高卧意慳慳

雪覆蘆花

滿江明月照平沙  
裝點漁村八九家  
更有一般清絕態  
皚皚白雪覆蘆花

雪裏騎牛探梅



皚皚一色滿山村  
懶慢無堪不出門  
忽有老翁過許  
犢小孤山下探冰魂

乍晴乍雨

乍晴還雨雨還晴天  
道猶然况世情譽我便是  
還毀我逃名却自為求名  
花開花謝春何管雲去雲來  
山不爭寄語世人須記認  
取歡無處得平生

雨中書懷

滿溪風浪夜來多  
茅屋蓬扉奈苦何  
亂滴小簷聲可數  
塊然身在碧雲窩

風雨示善行

小室掩蓬門寥寥對爾言  
庭花開便落階草剗  
還繁默坐詩成崇閑眠事不煩  
窮居誰道好積  
雨壞籬樊

雪曉三首

滿庭雪色白皚皚  
瓊樹銀花次第開  
向曉推窗  
頻著眼千峯秀處玉崔嵬

我似素安卧雪時  
小庭慵掃捲簾遲  
晚來風日  
茅簷暖閑看前山落粉枝

東籬金菊褪寒蕤  
霜襯千枝个个垂  
想得夜來



重壓雪從今不入和陶詩

風雨交作俄而開霽二首

風雨掩柴門四山雲霧昏  
客能排悶極貧可祛  
喧煩茶竈煙初起香爐火尚溫  
黑雲多漏日窻隙射朝暎

黃葉隨流水蒼苔染短墻  
世間功業少物外姓名香  
雨霽峯巖潤雲收松檜涼  
一身無長物得句探詩囊

雪霽口占數聯

瓊屑粘枝落琮璜  
觸石喧千山明霽色一逕畧

煙痕凍樹鳴飢鶻晴崖叫老猿有茶當羨醞無  
語坐朝暾

夜雪

昨暮陰雲黑今宵瑞雪濼覆松輕藹藹打竹細  
蕭蕭剪燭成詩雅歌床入夢饒破窻飛礫碎壞  
壁散珠飄翳月薰簾白微風攪帳搖靠屏燈焰  
短插鏝水沈燒一椀融和茗煎來境寂寥

春雪戲題三首

天如抹黑地如銀千點萬點浮逡巡窻外蒼松  
誰道耐一夜鬢鬆華髮新



縹渺天矯遠空薄  
荏苒閃點梅花額  
梅花額上春催粧  
暖風融融鉛膏滴  
泥團腫拆紅木  
芽雪汁嫩消青苔  
花濃雲謾彼碧天色  
冷氣逼我黃金茶

風雨三首

滿庭風雨懶開門  
無事頽然卧小軒  
清夢初回秋色晚  
紛紛黃葉墜東垣  
雨打梧桐葉葉聲  
惱人殘夢動詩情  
此間滋味無窮狀  
問向青山作麼生

我是青山無等尊  
碧山雲月供朝昏  
一生受用

應無盡不是人間傳子孫

秋雨

皇天淫溢又秋霖街巷泥濘一丈深田舍已愁  
收晚獲闔房應苦暵寒砧百川同灌何時歇萬  
壑爭流聲不禁唯有草堂閑卧客梧桐露滴不  
關心

風雨連朝

風雨連朝溪水生噴崖激石咽如笙空簷滴滴  
惱人夢寒樹騷騷暗鳥聲墻下菊莖枝偃亞峯  
前松籟響鏗錚錚幽人不管多風雨擅得雲山詩



以鳴

殘雪

隔林殘雪在千峯  
風料峭蕭森萬木中  
時有山禽叫聽此意  
慘悽起歌還自笑  
人生天地間所樂為  
功名奈何棄如屣  
放曠丘壑情爾顏  
日頽年光相逝更  
固宜守素志淡泊  
終平生

山雨

空山踈雨政浪浪  
驚起老龍爪尾長  
穩坐小堂終日睡  
洒簷餘瀝濕禪床

喜雨

喜雨連三日消流直萬金蒼涼消暑氣膏液洽  
民心簷溜連階滴松泉觸石吟傳聞市街上行  
潦滿蹄涔

雨晴

夜雨新晴巖溜零幽人高卧夢回醒露沾芳草  
迷三徑雲捲紫苔鋪一庭爐火尚溫添栢子溪  
流初漲挹銅瓶可人山色明如許當戶芙蓉數  
朶青

陰晴

終日陰晴晝閉門遠峯踈雨細昏昏和烟草色



隔林碧漱石澗聲當枕喧何地不堪為豹隱有  
山深處即陶園小堂人靜焚香坐得句清吟似  
嶺猿

風雲

朝雲

朝雲不卷碧山堆珠露溥溥一逕苔點綴花腮  
嬌未了依倚初日射庭槐

東風惡

東風惡東風惡料峭無時休東風有時動復靜  
人心盡日長哦咻若將人心比東風東風忸怩

為下風

嶺雲

嶺雲吹作雨朝露點成珠病後知身健貧來認  
我愚殘年唯藥物永日愛枯梧漸覺衰遲甚青  
山不負吾

又

嶺雲有機心或卷時或飛山月亦多情嬋妍來  
照衣不如閑機人高卧無是非羲皇是何人赫  
胥吾不慕但觀眼前趣拈來即所遇庭松落清  
陰庭草泫秋露物物自有理不勞求其故一笑



見青山拖筇時緩步

朝霧

關河千里混高低樹杪山巔一望齊  
應有南山玄豹隱只聞東嶺老猿啼  
還如漢準平城困恰似曹瞞赤壁迷  
霽後惺然瞠眼看數竿紅日映西溪

西風

昨夜西風撼我幃滿天星斗冷如流  
菊含蓓蕾徑霜艷楓染燕脂映日羞  
曳曳雲飛汾水岸蕭蕭葉墜洞庭舟  
平生最是關心處窻外梧桐葉

葉愁

江山白雲

白雲曉冪秋江歛江上孤峯螺一點毳毳霜蘂  
粘葦花湛湛江楓猩血染晚來白雲渡江去渺  
渺江澚征舟舟白雲不是無心者徃來舒卷長  
自在寄語白雲須訪我過我松關吾且待既與  
汝曹俱得意朝暮相從終莫改君不見通明只  
可自怡悅魯直看汝時拄笏古人曾與爾為歡  
我亦與爾盟已寒只恨徃來了無迹相對須更  
難盡歡俄然風起掃長空但看萬里峯噴岼



風緊

東嶺北風緊西山黃葉飛兀坐似枯株嘿嘿還  
如癡新詩八九首起余心怡怡緬我思古人而  
我猶為夫一笑入青山風霜終不渝鼎鼎百年  
內不受人馳驅買山又買懶其樂也愉愉終日  
對碧峯碧峯知我無

山岳

山之陰層巔白雪山之陽盤石蒼苔亦一  
段佳景也

半夜北風吹急雪千山萬山銀花白沈沈萬壑

翻松濤洞府雲深峯一色天教玉宇飛金烏向  
曉雲開霽光碧暉暉朝日正如赭喜見陽崖雪  
融冶盤陀石上蘚花綠恰似陽春膏潤野嫗煦  
暖氣入窻阿窻隙細細飛野馬清寒老子懶不  
起矯首側卧東窻下玉屏初輟遠近明風日暄  
妍如可寫援筆欲成白雪謠却恐傍人和彌寡  
擲筆一笑壯心生喜聞玉筋崩簷瓦

青山如許好

青山如許好澗水如許清四座無人聲一鳥簷  
前鳴頽然卧篤床黃葉堆前楹得句頗尖新一



笑豪氣橫欲倒三峽流欲掃千人兵可笑費屠  
龍博學無成名

宿峯頂

蘿月掛明鏡松泉鳴古琴夜深心地惺無復去  
來今

暮山

暮山如畫掃蛾眉輕抹晴嵐淡亦竒月上松梢  
鴉亂陣故城秋籜有寒吹

紀山名

雨洗瘦皆骨烟收露五臺香峯桂子落雪嶽玉

簪開長白遙兼聳頭流壯且魁名山窮眼界不  
必往蓬萊

豎假山

餘生已老竟無功甘作林泉拙病翁擬欲補天  
嗟未用一拳竒石作崆峒

佳殊窟

空洞深無底峻嶒聳有形滴乳成幙蓋起脊作  
欄檻淹入梯仙國驚捫隕宋星柳公如見此作  
記勒山屏

登童津山



童津山色碧崔嵬絕壁層崖石逕回獨荷短策  
尋古寺上方政在白雲堆

、還山

山中四月盡客卧動經旬四壁圖書蛀三間几  
席塵菁花多結實杏子已生仁靜倚屏風睡風  
為入幕賓

、登摩尼山

江華

摩尼山色好矗立海天隅飛鴈不能渡晴嵐惣  
可圖祭壇秋草老僧舍白雲孤一望滄溟闊煙  
波接有無

清涼山一首

清涼山上禮文殊却說塵中不自由  
筭盡世間多白髮碧杉松下一長吁

五臺山六首

此六首非清寒子  
手書姑錄而存之

五臺山上五雲飛慣聽溪流漱石時  
俯瞰人寰多少事奔忙多劫不如歸

圓通岩下般若淵潑潑遊魚隊隊  
翻脩且去歸觀了百年人事即纏絲

右東臺

中臺高嶽講時鍾杳靄蒼茫望不窮  
何處野僧



猶未到夕陽霞裏獨携筇

右中臺

北臺四月積殘雪青蔬白芷戴土出懶翁臺畔  
有高雲岑峯幽邃杳難測

右北臺

西巘高峯甚孤絕于筒水潭氣清冽上人携瓶  
自煎茶禮拜西方極樂佛

右西臺

山南峻磔號麒麟野草芳菲氣味真欲識五臺  
端的意眼中瞳子面前人

右南臺

又

五臺昔日新羅地神聖孝明從此出  
崔烏坪裏百官屯呼號仰天攔道笑  
岩穴林間盡追搜草食破衣形如鶴  
大寶神位不可闕百僚圍繞作君師  
斯盧一區世蹭蹬千年鴻業基于茲  
復有信孝出公州射鶴一羽緣大悲  
慈藏不識老曼殊生增上慢深大癡  
月精寺基邈猶在古碑寶塔何瑰竒  
我今送子一遨遊且須這裏開雙眉  
五萬峯頭秋月低慣問峯頂子規啼  
秋風淅瀝



驚殘樹寒月嬋妍上土階明歷歷時還了了苔  
斑斑處草萋萋五臺山境人如問十里松間芋  
葉齊

江河

溪漲

驟雨崩騰雷車回前溪水漲何雄哉浪花蹴地  
玉龍吼雪岳轉空霹靂走枯查激石墮危峯折  
我齋前千丈松只恐沙石填虛谷漉漫懷襄亂  
坤軸老夫懶慢不堪起卧聽遙壑明珠萬斛瀉  
蒼壁

買蓑觀漲而還

百錢新買綠蓑衣  
觀漲溪橋帶晚歸  
細雨斜風吹不斷  
一肩高聳入蓬扉

泉石

溫泉

白川

一泓泉水暖如湯  
曾與秦皇洗唾瘡  
不是咸池餘液沸  
也應泥底火龍藏

竹筧

剗竹引寒泉  
琅琅終夜鳴  
轉來深澗涸  
分出小槽平  
細聲和夢咽  
清韻入茶烹  
不費垂寒綆  
銀



床百尺牽

遊冷泉洞

六月甚酷熱大地如洪爐  
竭來冽泉洞石罅清  
瀾號浴乎復風乎嘯詠而  
踟躕此樂料知少點  
爾為吾徒

溪澗

貂溪洞

偶入貂溪洞煙霞水石間  
松檜鬱蒼蒼溪澗鳴  
潺潺落葉沒磴徑羚羊窟  
巖阻蒼苔滑如塗白  
雲飛如絮洞深雪猶積  
草芽屈金箸松桂相縈

纏清香撲我鼻境靜稱我心頓忘身世累寄語  
同隱者福地神所闕絕嶮峯我岡插竹以為誌

憇絕澗中盤石

盤石鋪澗底澗水流不鳴分流不浸處石面如  
砥平可以坐十人亦可安茶鐺我喜投筇杖或  
坐又復卧枕流慕古人可洗塵土浣耽遊忘却  
還不覺日西過起起懵懂骸咄咄木上座

月夜宴坐盤石

東山蘿月正分明遙指呵呵笑一聲謝豹後峯  
啼血叫訓狐中夜怪人鳴心如古澗無查滓身



似閑雲不世情獨坐寒巖誰是主  
蒼屏萬疊聳崢嶸

坐溪邊石

絕澗聲泠泠上有盤石平  
陰陰樹木榮山鳥時  
一聲俯瞰深潭清可以濯我纓  
年來少塵事泉石愜素志  
將製芟荷衣紉蘭佩薜荔遠謝萬丈  
塵自有凌雲翅堂堂大丈夫豈肯為虫臂

新漲

昨夜山中溪水生石橋柱下玉鏘鏗  
可憐嗚咽悲鳴意應帶奔流不返情

開渠

為憐蔬圃負巖隈  
荷鍤殷勤一道開  
斲斲竹根猶未穩  
况侵山路洗莓苔

樓閣

題院樓二首

玉山東畔清風院  
衝雨登臨一少留  
忽聽夕陽江上笛  
白雲鄉思也悠悠

四面溪山擁小樓  
清風吹骨忽驚秋  
金龜換酒人何處  
斷雨殘雲自在愁

夜宿江樓



清江秋月白浪打古城頭遠浦漁燈迥滄波蜃  
氣浮蘋洲風力緊沙磧鴈聲愁一夜逢僧話團  
藥叙舊遊

、運籌樓

却敵竒謀樽俎間熊羆帳外列成班山城風勁  
瑀弓健海國煙消白馬閒車騎燕然初勒石伏  
波交趾已征蠻運籌壯策人如問刀斗收聲門  
不關

、重登百祥樓

重過此地無窮思一望平原送落暉蘆水故城

殘靄散晴川  
秋樹暮煙歸  
空濠荒草埋  
翁仲華表凝  
雲語令威獨  
倚畫欄無與  
語白鷗依舊  
向人飛

登大同樓

大同波上大同樓  
無限雲山散不收  
楓落溟江秋水冷  
霜清箕堞暮煙浮  
白鷗洲畔月千里  
黃蒿渡頭風滿舟  
因憶昔年興廢事  
登高一望思悠悠

登碧瀾渡樓

碧瀾之水碧如油  
漾漾溶溶菴葦秋  
白鷗慣人



不飛去綠荇隨水相飄浮何處一聲漁笛遠誰  
家十里炊煙浮波寒日暮不能渡繫纜獨倚江  
邊樓

亭榭

秋亭

秋亭山氣好崢嶸江上猩楓刮眼明巖瘦不因  
嫌太富澗清非是釣完名寒花千朵經風曲嫩  
苔一庭緣雨生點檢人間無勝事林泉興味老  
多情

修山亭三首

最愛茲亭好青山映小簷經行雲去遠穩坐鳥  
來覘花草年年長風光歲歲添誅茅更修葺幽  
境最清恬

水石清竒處山亭愜野情鳥歸庭有跡花落樹  
無聲遊蟻緣階上飛蝗趯草行興來看物化頓  
覺脫塵纓

列岫千層碧長江一帶明自與人世遠非愛嶺  
猿盟小徑緣松曲荒階與草平此生須得意無  
物不風情

松亭



松亭寂寂松枝蟠幅巾藜杖來盤桓影落一庭  
碧苔潤聲撼半天清風寒舉頭不見有赫日側  
耳時聽搖狂瀾茶烟颺處鶴飛去藥杵敲時雲  
闌珊人散夕陽禽鳥鳴正是客去碁初殘

山亭

白雲為帳碧山屏絕勝羲之修楔亭莫羨石家  
椒百斛苔錢十萬散中庭

園林

、遊園戲作

托迹烟霞萬事宜心如五紀未生時東園種菜

元非俗西塢看花又一奇坦率情懷誰似我虛  
閑風月趁相期老來無復追歡夢身逐清江曳  
尾龜

鉏徑

山逕茅茨塞長鑿手自鋤露沾衣袂濕蟬噪樹  
陰踈荆棘從教剗噴岼且莫除穿雲斜避石巖  
竇是吾廬

歲晚居城東瀑布之頂青松白石甚愜余  
意和靖節歸園田詩五首

晚居城東陸水石勝廬山下築依寒巖窮居逾



數年玄豹隱南山神龍襲九淵修我玄牝門鋤  
我絳宮田足以保殘生豈戀浮沈間野鹿馴階  
除山鳥鳴簷前讀罷藥珠經古篆消香烟尋芳  
東澗涯採藥南山巔一拋利名場萬事多閑閑  
笑傲北窻下自喜陶陶然  
白雲何逢逢紅塵常鞅鞅緬懷沮溺耕時復注  
遐想翛然細萬物林泉聊獨往一逕苑木深一  
逕松竹長一徑曳屣行商歌我居廣更製芟荷  
衣端欲老林莽

自我遠城市柴門來往稀凌晨陟南岳日晚斷

苓歸歸來渡溪水溪水漸裳衣我豈嫌俗氛世  
我徒相違

蕭條一蝸廬聊足以自娛不見渠渠屋瞬目成  
榛墟昔年歌舞地今為狐兔居愛我屋一間危  
坐如枯株時復卧溪石樾陰涼翳如不憂生事  
拙朝窘夕無餘但愛巖竇深松窓蘿月虛狂呼  
問古人古人如此無我憶賀知章歸老鏡湖曲  
雖無印綬榮心閑萬事足却嗟世上人恰似蟻  
環局我坐碧山屏月為清夜燭彈琴和陶詩不  
覺東方旭



昔我探春時探花馳紫陌今我探春時策杖隨  
所適緣溪數落花不知日西夕幽鳥語林巒蒼  
鼠竄巖隙既脫赤紱縻又免縣官役黃精供朝  
夕綠荷代紡績平生伴山雲願效商也益

燕飲

將軍宴

碧油幢裏錦筵開樽俎笙簧次第排虓將舞揮  
金錯落蛾眉歌進玉蓮杯金猊爐上薰龍腦銀  
鏤床頭泣豹胎醕酏大平全盛日繁絃急管莫  
相催

觀使華宴

飛燕雙雙掠又迴  
流鶯恰恰語  
花開十年往事  
詩千首  
萬里歸心  
酒百杯  
星斗已稀  
銀燭短絃  
歌不盡  
玉山頽醺然  
半醉兒牽袂  
君去遼西幾  
日來

菓實

園中瓜五詠

紫芒未脫花未落  
綠膚冰肌和露摘  
入我蔬盤  
滿我意  
或炙或茹  
滋味足  
人言青瓜勝西瓜  
可充蔬厨種  
當暑十年山水  
謾容與一味生涯遠



如許煙蓑雨笠手自種一握青瑤滿筐筥却笑  
何曾萬錢費適口為珍誰定味懶卧山齋供晚  
炊上界仙羞潤腸胃

右青瓜

甜瓜爛熟蒂自落剥而食之甘如蜜綠皮初學  
老菜衣霜肌可療相如渴玉液瓊漿填其腹一  
嚼也勝浮萍實老夫山中學樊圃細雨手種瓜  
與侏葉底離離不知數對客甜冰雜茗雪兀然  
坐我清虛府却喜肝臟滌蒸鬱可惜泪沒塵中  
人萬事相依瓜與葛

右甜瓜

天上火雲作峯頂大地山河如粥鼎午景燒空  
凝不去暑氣逼人如醕酏石竇寒泉流欲渴蕉  
衣葵扇無功烈西國誰傳種玉方活我暘谷炎  
蒸域水晶拆處玉粒屯甘井鑿後瓊漿翻青門  
朱陵邈以遠世變人亡不復返紙上餘錢載簡  
編空有話靶留人傳我有東園十畝田顆顆離  
離如盎圓山中風露日滋蔓境遠無隣可修怨  
渴來切破蒼玉瓶一嚼可能消我悶

右西瓜



綠藜紫莧已慣腸角筍拳蔽莖已剛夏末秋初  
蔬盤中喜見紫瓜圓而長身累百贅是何愆頸  
附千疣尤可傷雖然剥之銀酥胸一啖頓覺肝  
膽涼炮之烹之用無窮上天所賚吾得嘗人間  
芻豢五鼎烹終然屢被寵辱驚不如此味淡還  
濃自有富貴風流情君不見隱之啖蔬操愈厲  
景節種此褒其清俗子生踈不下筋我種此瓜  
終餘生

右紫瓜

白露已晞霜初肅白瓜帶粉長二尺拔出金刀

斫霜膚小鎊爛煮鹽豉泣滋味絕勝東坡羹犢  
角熊蹯企莫及或和勺藥淹為蕪香甜粹脆真  
無敵却笑周顛若知此不獨晚菘擅秋末易簡  
如咀此味珍冰壺先生當屈膝老子明年身若  
健更種珍瓜施茅屋待得秋天肥熟時不慕東  
陵瓜五色

右白瓜

丹橘

我聞洞庭有千頭撲鼻清香銷客愁又聞江陵  
種千樹不減敕賜千戶侯金星最好霜後看玉



漿可堪盃中浮青黃雜糅文章爛磊落圓果朝  
夕翫孰知凌寒堅固節自有慄烈寒酸質但不  
深根又固蒂苦被愚人林下摘

黃橙

酷愛霜橙香且團壓枝秋實光爛斑并刀劈破  
黃金顆色味絕勝柑橘間泛泛新浮綠蟻觴一  
吸瓊漿爽腸胃已聞吳娃袖裏香更堪傖父樽  
前味南國秋深霜風吹細細清香來擁鼻一年  
好景着眼看千箇萬箇垂纍纍

红柿

秋風烈烈霜作威  
雨過園林紅葉稀  
朝輝初出海天宇  
光芒射我園中樹  
團團萬點頰虬卵  
映日玲瓏圍火傘  
味甘豈同柑橘奴  
肌豐不比棗荔癯  
君不見沈瑀種之  
教民富鄭虔書葉  
成巨儒七絕堪為  
百果雄愛見葉裏  
垂紅珠

胡桃

昔年張騫使西戎  
得此異果種秦中  
後人愛之漸蕃滋  
厥後此果盈天東  
皮薄肌多可充籩  
外剛內柔如古賢  
况復珍瓢頗甘美  
嘉實離離青葉裏  
秋晚風霜搖落時  
脫殼墜庭聲可喜  
擘碎



麝處試一嘗松子栢仁那專美

得橘戲題

一顆江南橘千株霜後黃偶然開殼了撲鼻擁  
清香

書畫

畫梅花

香魂玉骨先春妍獨占孤山烟雨邊踈影暗香  
雖不動清姝風韻正依然

畫杏花

活色生紅第一梢何人拈筆上床描出墻千朵

多才思腸斷飄香賣酒橋

淨几讀書

世人奔競倚吹噓不學無知步玉除誤國誤民  
為後笑何如淨几讀經書

古之為仕者不欲躁進以立其身但修  
天爵而已如伊之耕莘呂之釣渭何嘗  
有心於求宦哉然湯之三聘文之一見  
出而便會風雲者以其道德夙著能啓  
沃人主何嘗為人主之黜陟哉今則不  
然依勢吹噓苟登仕路至有筮仕而省



事者矣則其所與人語者皆為祿為身也何暇啓沃於人主哉此余少年讀書時未嘗不掩卷而長嘆也然苟不得修道德如伊呂必也讀書乎雖不能慎思篤行其與無知盖有分矣

### 降龍解虎圖

嵯峨山逕轉崎嶇便是高僧遊戲時寶鉢降龍潭水靜金鈷解虎老松歌空山雨過莓苔滑小洞春深花木竒見說塵中多少事一生元自不曾知

讀左氏春秋

蚌鷓相持未可期紛紛或敗幾多時不乾詛血  
猶交刃未瘞殤骸又鑽龜王室細於單縷繫霸  
功爰似累碁危哀哉尼父明斧袞裘鳳傷麟耐  
可追

題幽篁古木圖

君不見見晉室陵夷綱紀壞風流高士尚清話又  
不見戰國爭雄刑政頽漆園傲吏談滑稽或愛  
放曠遊竹林或以槁木擬灰心古人邈矣不復  
作空餘千載留方冊今觀此畫思杳杳清興已



在風塵表幽篁蕭瑟葉相戰古木查牙枝相纏  
狂根枯幹如有情半折寒枝如有聲淨掃虛堂  
展一幅素壁如聞天籟鳴良工能事泄天工滌  
我萬古塵土胷韋偃與可已為鬼阿誰下筆傳  
高蹤遙想含毫吮墨時只見竹木忘所知豈獨  
忘知亦忘我物我兩忘翛然坐須臾變化無窮  
緒妙在毫芒不動處得之於心應在手筆驅造  
化意軒舉一枝一幹不經思婆娑盤屈有倫序  
理會冥造莫可狀真到極則但形語澹然相對  
絕離微畫師機心妙如許畢竟俗士那得知時

有山童敲藥杵

讀春秋詩

偉哉大聖謹嚴筆作於雅亡王迹滅首建大義  
尊天子大書特書王正月攘夷討賊整紀綱字  
字華袞與鈇鉞嗚呼周轍不復西大夫擅政侯  
專伐天王之名擁虛器危哉岌乎如旒綴下陵  
上替貢獻弛求車求金求不絕五霸迭興似尊  
周爭奈詐力非真實欲挾天子令諸侯狐假虎  
威百獸屈是故夫子大傷嘆曰無義戰魯有說  
夷狄不與華夏例吳楚自是連王室灾異必書



疑則闕月食不書必書日此皆聖人警後世憂  
之也深慮之切大建百王不易法西狩獲麟是  
終訣知聖罪聖在此書猶如畫工運神術遂使  
遙遙千載下亂臣賊子皆屈膝嗚呼公穀傳其  
訛左氏浮夸不經出後人疑必失其真簡編斷  
錯多遺闕昌黎東傳求遺經臨川斷爛無可質  
漢儒明言大一統紛紛歷歷議論別自從胡氏  
一刪煩表出大義凜霜雪我本千載燕趙士撫  
劒擊筑悲嗚咽披床一讀一長嘆西風為我吹

浙浙

文章

戲為

文章於道未為尊，三百餘篇學孔門。  
商也起予能杜口，大塊假我可無言。  
風烟藹藹揮肝膽，珠玉琅琅入吐吞。  
千首輕侯應有分，狂歌醉墨自瀾翻。

學詩二首

客言詩可學，余對不能傳。  
但看其妙處，莫問有聲騷。  
山靜雲收野，江澄月上天。  
此時如得旨，探我句中仙。



客言詩可學詩法似寒泉觸石多鳴咽盈潭靜  
不喧屈莊多慷慨魏晉漸拏煩勦斷尋常格玄  
關未易言

題剪燈新話後

山陽君子弄機杼手剪燈火錄竒語有文有騷  
有記事遊戲滑稽有倫序美如春葩變如雲風  
流話柄在一舉初若無憑後有味佳境恰似甘  
蔗茹龍戰鬼車與雉雉夫子不刪良有以語關  
世教怪不妨事涉感人誕可喜曾見河間記滌  
奔復見毛穎錄亡是護落大瓠漆園吏怪詭天

問三問子又閱此話踵前踐夔罔騰連魚龍舞  
上駕屈莊軼韓柳六六巫山走雲雨陶壁飛梭  
溫然犀橘叟初喫龍根脯輪困肝膽貯造化澹  
蕩筆下煙蜂午金翠墓前溪山麗羅趙宅中苔  
草細聚景園外荷香馥秋香亭畔月色白使人  
對此心緬邈幻泡竒踪如在目獨卧山堂春夢  
醒飛花數片點床額眼閱一篇足啓齒蕩我平  
生磊塊臆

婦女

蠶婦



屋頭斜日映花枝  
憂憂縹車煇雪絲  
粧嫩低眉緣底事  
只愁分繭効功時

文房

洗硯後戲題自嘲

右軍筆法傳者少  
翰林詩豪沈江水  
汝獨何為抱瑰竒  
日寫危言千萬紙  
由來多語衆所忌  
縱汝能言亦末技  
三代遺訓載方冊  
魯叟刪定藏璧裏  
祖龍焚燬化為燼  
咸陽原上成塵土  
子雲閉門著太玄  
蒼天重淵搜勝腑  
那堪後人纂醬  
甌亦不收入經書府  
勞汝精神祭汝藁  
不如安

坐負朝陽窮愁著書以自見不如高卧北窓涼  
古今陳迹皆可數不過謗姓剡藤背讚何足喜  
毀何憎分明原上封土塊願爾嗒然拱中堂凝  
神瞑目鋤荒唐百體從令若俛首有如芒芴遵  
紀綱俄而陽春為我布煙景大塊假我呈文章  
百花競發佳木芳風光撩我搜詩腸座中侍側  
三四輩皆有技藝相騰驤弘農洗面露腹卧客  
卿搖首磨其胸楮郎高義如雪霜折旋中矩叅  
兩公末席何處中書君懸河利嘴如霜鋒楮郎  
堅卧不出床中書馳驟剡溪傍才藝雖殊意則



同皆助飄逸凌雲氣吐出明珠三百斛擲地金  
聲不足貴難者趨退謝不敏眼前景物尤繁華  
安得陶景嶺上雲攤為玉牋之金花宋鐵千丈  
崖磨為端溪之金炯蟾蜍腹裏藏洞庭禿盡中  
山千首頽赭徂徠之松製印香之餅操以長杠  
之槩掣如驚電之影其揮也風掃雲聚其曳也  
斗轉河迴鏗金戛玉相鳴怒猊渴驥喧騰獻賦  
長楊日斜回攔街爭賀真竒才

器用

紙帳

紙帳明煖也相宜  
牢落生涯我自知  
古篆輕嵐吹裊裊  
踈簾薄影動絲絲  
身如短梗隨波泛  
心似孤雲任意飛  
縮項嗟噓天又雪  
小窻呵手課新詩

呈秋扇於四佳亭三首

團扇秋來已薄  
息固窮終不入侯門  
雖然更值炎蒸日  
定憶松濤石上喧

用舍行藏各有時  
秋天莫使怨班姬  
相公若慰邦黎庶  
播却仁風更播誰

避涼趨熱謁車塵  
玩物猶然况世人  
笑渠不知



標櫟壽恨公拋擲掌中珍

地爐

山房清悄夜何長  
閑剔燈花卧土床  
賴有地爐偏饒我  
客來時復煮茶湯

燈燭

村燈

日落半江昏一點  
明遠村熒煌穿竹徑  
的歷透籬根  
旅館愁聞鴈紗窻  
倦繡鴛蕭蕭秋葉  
相對正銷魂

梅月堂詩集卷之四



梅月堂詩集卷之五

食物

甜葫蘆

苦葉由來不可嘗甜葫也勝太官羊爛蒸莫折  
天然頂飲我清齋糠粃觴

供厨何所有

供厨何所有晚菘與甜菘床上何所有博山添  
宿火而我在其間無可無不可欲卧則便卧欲  
坐則便坐邇來三十年觸事常懶惰花塢蔓蒺  
藜筆管生螺羸閉門斷紛厖杜口妨話墮支頤

睡初醒小室香烟鎖

食粥

白粥如膏穩朝餐飽來偃卧夢邯鄲人間三萬  
六千日且莫咻咻多苦酸

盤飧三首

白鹽赤米盤中味紅蓼青蔬椀裏香午睡覺來  
供一頓陶陶無事送年光

爛蒸蘿蔔又燂菰山飯隨宜旋煮茶不飽不飢  
閑偃卧方知身世似浮槎

井冽寒泉盍有糧胡為乎自欲遑遑碧山終日



無伎倆半映詩脾半映牀

酒

佯酒歡甚

自喜生來放且閑  
世間名利不相關  
少陵太瘦元非瘦  
彭澤求官豈是官  
落拓不因縈世網  
磊塊只好壓儒酸  
小窻終日無思慮  
閑看遊絲上小闌

無酒

李白把酒問月飲  
塊然一斗詩百篇  
淵明引壺眎庭醉  
悠然自樂羲皇天  
而我千載猶為人  
獨

對青山無酒錢司業助廣文坐客寒無氈王弘  
送彭澤空坐菊花邊吾非請息交自然絕世緣  
世我相矛盾遨遊三十年無人過濁醪情悄如  
耽禪安得盡捨書籍賣卜築移家居酒泉

醉酒

得酒無端喜欲狂百年人世定蹉跎莊周初醒  
夢元載新挑鼻準魔花徑浪遊同蔣詡詩  
壇獨步似廉頗問山我是何為者宇宙開來知  
我麼

茶



雀舌

南國春風軟欲起茶林葉底含尖觜揀出嫩芽  
極通靈味品曾收鴻漸經紫笋抽出旗槍間鳳  
餅龍團徒範形碧玉甌中活火烹蟹眼初生松  
風鳴山堂夜靜客圍坐一啜雲腴雙眼明党家  
淺斟彼粗人那識雪茶如許清

煮茶二首

松風輕拂煮茶烟裊裊斜橫落澗邊月上東窻  
猶未睡挈瓶歸去汲寒泉

自怪生來厭俗塵入門題鳳已經春煮茶黃葉

君知否却恐題詩洩隱淪

禽

啄木

啄木啄木爾何窮  
啄我庭樹聲丁東  
啄之不足恰恰鳴  
畏人避向深林中  
林深山靜啄愈響  
惜幾槎牙枝上虫  
蠹多虫老飽汝腹  
爾於啄蠹多全功  
世上蠹物害民者  
千百其數無人攻  
縱汝利觜除木灾  
人間蠹穴詎能空

野鳥

綿蠻枝上鳥隨意便能鳴  
適志從吾好安心只



欲平驕榮爭似隱  
苦學不如耕  
詩酒消閑日  
陶然送一生

聞布穀

四月暮山深  
布穀啼綠樹  
閑居漸喜日  
初長懶慢更添新  
睡起杖藜徐步看  
南山片片閑雲度  
無數眼底風光  
遽如許  
跳丸兩輪倏飛  
驚男兒生無所  
成頭髮白老  
老大大將何益  
不如朗吟千首  
詩萬戶侯輕亦不惡

月夜聞子規二首

東山月上杜鵑啼  
徙倚南軒意轉悽  
爾道不如

歸去好蜀天何處水雲迷  
歸去春山幾度聞春山處處結愁雲不知何許  
蠻叢路還有思君不見君

慈烏啼

啞啞枝上吐哀音飛遶荒城楓樹林莫向綠窻  
啼更苦五更殘夢正關心

子規

千疊峯頭月欲低聲聲偏向耳邊啼不如歸去  
將何去故國天遙只在西

鳴鳩



均呼七子綠陰叢麥熟梅肥五月中叫斷年光  
渾不識隴頭桑葢已殷紅

禽鳥向榮木以隨鳴

洞口百禽號洞裏無鳥聲樹木漸向榮漸入高  
峯鳴百舌語千般杜宇呼自名一一叫年光催  
換令人老韶華倏以變幾人生懊惱懊惱勿復  
道宜修超世道

、聞杜宇

杜宇促人歸令人淚濕衣萬峯千疊裏百叫一  
番飛迸裂春山竹啼殘曉月輝訴冤冤不盡聞

爾正依依

聞子規

千峯疊疊萬木深山靄蒼蒼斜日暮獨坐茅簷  
思不禁子規啼在籠煙樹曾聞爾是蜀帝魂胡  
乃不歸蠶叢路人言有翼可能飛誰向空山告  
楞柱

開慶寺谷深樹密雖無絕險之岡而且  
有雲林之狀百鳥和鳴晝夜無時可以遣悶  
故做梅蘇故事作五禽言

布穀

布穀古人以脫袴同為布穀今山鳩也詩之鳩鳩是也東人所言布穀者



異此碧黑  
無文似鷓

布穀兒爾何愚去歲力農輸官租今年雖欲勤  
攏畝奈此藥莧為朝晡願天年年禾穀登田家  
不用催鷓鴣

脫敝袴

即山鳩也淡碧無  
文狀與鷓鴣同

脫敝袴催脫衣山深四月春芳菲花信風吹寒  
可掬著袴猶戀清朝暉好去江南春暖地啼向  
榕陰穠且肥

欺妾婦

欺妾婦汝莫悍盡是卿卿情所玩但修婦道縫

衣裳舊踈新寵何足筭百年信誓須朝朝淇則  
有岸隰有泮

我欲死

我欲死埋山岡四月青梅如耳璫深林無果可  
以食飛向枯枝空斷腸禽兮禽兮爾何苦不思  
伯夷飢首陽

不如歸

不如歸歸故鄉蜀天空闊雲茫茫千峯疊疊不  
可越萬木重重無處望欲歸未歸摧心腸客中  
雖樂徒增傷



巢燕

巢燕喃喃傍小簷雙雙相對語前簾巧啣花底  
青泥片唇帶殘香次第粘

秋鶯

一陣新涼吹柳絲溪桃落子碧梧衰老鶯不覺  
時將換弄得年華似舊時

聞青鳥聲有感

夢聽步虛芙蓉城睡罷初聞青鳥聲間關覓  
紅杏枝屋頭斜日穿林明初如怨訴妾薄命後  
似永巷承恩輕又如放臣逐客在湘南細讀離

騷鳴不平山中老人會寧馨為爾夢覺遊中庭  
三个五个草芽抽一片二片花飄零減却春風  
愁殺人芳洲之草何青青年光鼎鼎一飛鳥擾  
擾浮世誰能停青鳥青鳥知爾遠涉崑崙巔歸  
來煩語西母前遺我碧桃三千年我欲手栽千  
樹桃銷盡人間愁纏絲言訖翱翔忽飛去碧天  
遼闊收雲烟

聞鵲

杳杳乾鵲繞庭枝細料無人款我扉只有清風  
似相識故來撼撼簾簾幃



燕燕

燕燕飛飛過短墻也無閑事為誰忙青山影裏  
獨穩步翠竹陰中閑鎖房古樹夕陽扶拄杖小  
亭秋日據胡床放歌大笑復自謔意氣老來猶  
激昂

月中聞鴈

小堂秋夜月團團閑聽征鴻獨倚欄斷續聲來  
天淡淡聯翩影過路漫漫玉關霜重邊衣冷香  
幄風高錦衾寒到此情懷遠如許牽愁且莫響  
雲端

孤鴈

一聲相失萬重雲紫塞天高何處分片影獨尋  
湘水闊遙音偏向旅窓聞  
任回暮雨誰相念欲  
下寒塘不見羣應羨晚鴉無意緒荒城樓聚噪  
紛紛

歸鴈

數聲歸鴈點清虛  
遙憶瀟湘萬里餘  
關塞風高鳴漸遠  
江潭木落影偏踈  
曾離朔漠辭邊雪  
應帶天山寄遠書  
好向洞庭深處宿  
楚人矰繳不饒渠



恠鳥

恠鳥不可名  
夜夜鳴耳邊  
無人會汝語  
願避鷹與鷗  
縱饒騰舌多  
多言為汝愆  
不如緘爾口  
飛入千峯烟  
萬般訴春風  
春風其汝憐  
可比饒舌者  
刈方為團圓  
竟遭少年彈  
安能宥以逢  
時勿喇喇勢  
盡應嗒然

獸

羚羊逐晴崖以曝日

暉暉朝日暖  
晴崖方煦嫗  
羚羊巧曝背  
瞑目和噓煦  
怡暢四肢融  
自欣得佳遇  
洞深崖又險  
安

帖不驚懼我愛得其所徐徐撫其背初若乍驚  
愕漸馴與我伍嗅我舐我膚抵額喜相對汝亦  
羊外羊我亦人外人同是物外物各保身外身  
誰追汝歧路誰訪我灝濱汝角掛寒巖我冠彈  
松風汝尾掉蒼苔我足漱飛瀑熙熙同負暄共  
棲青山峯

虎

山君哮吼傍巖隈百獸潛蹤木石摧掉尾回眸  
如掣電磨牙鼓吻似奔雷風前長嘯危峯下雨  
後留蹤狹徑來嗟爾威稜雖可畏李廣神箭莫



徘徊

碩鼠

碩鼠復碩鼠無食我場粟三歲已慣汝則莫我  
肯穀逝將去汝土適彼娛樂國碩鼠復碩鼠有  
牙如利刃既害我耘耔又嚙我車軻使我不得  
行亦復不得進碩鼠復碩鼠有聲常唧唧佞言  
巧害人使人心怵怵安得不仁猫一捕無有子  
碩鼠一產兒乳哺滿我屋我非永某氏付之張  
湯獄填汝深窟穴使之滅蹤跡

猫兒

立功鼠穴便空虛  
閑卧花氈飽有餘  
一室清平無外警  
却來梳下弄衣裾

虫

寒蠅二首

寒蠅倚壁上  
戢翅作枯殭  
變亂人多嫉  
喧煩臂莫攘  
風寒如殄瘁  
室暖又飛翔  
勿復重蘇活  
深呵止棘章

溽暑多豪壯  
清霜不自由  
畫梁加刺點  
粉壁受黥疣  
薄翅容無地  
寒蹤貼一隅  
得時須勿恣  
勢盡欲誰尤



促織

夜靜天如掃空堂月色明草根吟更苦床下訴  
中情玉砌風初動銀河露已傾聲聲惱人意聽  
爾起愁城

蜂鑽紙

蜂鑽紙蜂鑽紙吾嗟爾之為惑世界如許寬爾  
生如許窄奈何撲明窻竟不見窻隙鼓翅聲  
薨薨噬澁細咽咽私語似戀花踈踏如惜蜜一室  
跡雖拘心在名花實我憫爾之苦諄諄言提耳  
爾之苦於此亦爾自取爾爾向名園中評品各

花蘂囂囂膝口喧弄吻不知止多為造物忤却  
被天公嗔使之繫一隅不復搖爾唇君不見世  
間品藻評人物耳屬于垣曾不覺得失長短議  
如衡未免秋他苦謠諼獨不見雙雙對舞傳粉  
郎暖風晴日相彷徨嘿嘿不語偷名香勾管春  
妍阿誰猜風流月夜宿花房富貴芳園挑香腮  
栩栩蘧蘧百花場花亦嫣然渠亦忙蜜口蠟言  
衆所嗤周廟三緘宜爾規言訖開窻恣飛去風  
輕煙淡斜陽時千紅萬紫妬芳菲巧語未了添  
瘦辭懲羹吹虀即莫揆從遭百罹其可追



聞蟬且警

山中五月暮綠葉鳴風蟬聲聲替人愁欲斷還  
復連萬物各有伎飲豕隨其便奈何抱枝號風  
露為稻梁清吟處高潔也須避螳螂螳螂議汝  
後節操徒取殃古來耿介者抱節身或亡不如  
守汝分轉丸為蝓蟧不見南華語木以直而戕

螢火

山中夜雨霽仲夏見飛螢草際明如火池邊聚  
似星點衣終不落緣壁竟能零細撲輕羅扇低  
遮短畫屏飄飄流入戶的礫亂交庭月下依稀

白燈前彷彿青風吹  
尤熠熠露洗更熒熒  
稍得放光燄粗傳遐舉  
翎幸從腐草出適稟大陽形  
煬帝宵遊谷車公夜讀  
檣堪嗟幾箇燭絡繹耀  
還暝

嘲蜂二首

世亂時危決去留  
那能屑屑戀重遊  
不知鬚鬢霜華染  
慷慨論時猶未休

去國遲遲趨兩衙  
東西奔競愛啾嘩  
虫乎佞者終難辨  
應愛梨園弟子家

羨蜂二首



戀主孤忠死不虧北風歌罷去遲遲展禽芳躅  
無人繼千古壺公聖得知

漢表梅福為仙去周末陳搏入華山若使此人  
操汝節千秋不獨譽逢干

魚

盆池魚

盆池斗水僅免困盆池鱖魚不盈寸悠悠揚揚  
得自如環繞假山千里遠不待決汝西江水不  
待變化九萬里鼓浪一泓風浪平天地振鬣徒  
為耳君不見江湖之魚畏釣與獺縱道相忘非

可喜又不見洿池之魚遊即涸涸即死不如與  
我兩無虞分飯分泉聊以娛蟄身淺水且莫恥  
蕭曹自是刁筆徒他年放汝縱江海肯念一斗  
池水無

竹

盆竹

為憐貞節操種得小瓦盆玲瓏如有態瀟洒又  
無煩嫋嫋風吹動漚漚露滴翻誰知一撮土迸  
却化龍根

竹筍



昔我遨遊南土時山中脩竹如雲披不憚山中  
嶮巖路飽叅石頭玉版師春風喚起籜龍兒嶄  
然頭角無人知抽犀抱錦森森立折得琅玕圍  
粉籜燒來殮玉潤詩腸鵝掌熊蹯當避席及時  
供厨勿踟躕明日風吹應作竹

山中竹

綠竹出巖隈托根巖下土老去節愈剛蕭蕭蔽  
夜雨根迸化蒼龍枝短不棲鳳幹凌雪霜侵影  
受風月弄却恨長深谷欠遇微之諷我來久徘徊  
嘯吟忘出洞日暮輕颯起憂憂相摩闕似歎

無知音空山悲惚恫

看竹四首

古寺北垣竹種來知幾春僧居不記箇客來無  
看人老根斜起亂風葉細生皴愛爾移時坐殷  
勤與汝鄰

歲寒不改操葉葉藏青春我是新知伴君為舊  
住人自誇蒼節勁應笑白眉皴對卿殊有意得  
錢買山鄰

巖竇托根日邇年多少春定能知客性應自厭  
塵人琅玕新粉滑筓筓舊皮皴寂歷青山晚携



筇乞卜隣

山中糜歲月行樂十年春竹祖書年記龍孫問  
主人地寒無奈苦風勁不應斂我欲移君培幽  
居必擇隣

種竹九首

和泥種得碧琅玕移培瓷盆靠假山不是與君  
同節操此君風味等閑看  
小春天氣稍寒溫移竹南隣養小軒問爾俗人  
能愛爾澹然相對已忘言

瘦碧含風節更剛可憐委棄壞垣傍森森一徑

無人掃黃葉堆根蔓草荒  
碧根曲曲帶枯荻稚笋尖尖已孕胎穿我莓苔  
渾不厭葳蕤引得鳳凰來

辛苦移居只為君風霜月夜揖清芬  
翻思蔣子開三徑輸了高標眼有筋

凜凜清威老更臞脩然風露翠相扶  
杜陵饒舌君知不曾道環圍十萬夫

桃李芳華能幾時無情風雨謝繁枝  
要看留得長春意須待冰霜凜冽時

尖葉瘦枝最可憐結根石上已多年  
從今移向



閑田地階下蒼苔任汝穿

不厭成林鳥雀喧只愁雪壓折新枝  
殷勤扶後防搖裊榮瘁還應汝自知

木

、葉落

落葉不可掃偏宜清夜聞風來聲撼撼  
月上影紛紛敲窻驚客夢疊砌沒苔紋  
帶雨情無奈空山瘦十分

松聲

庭院松濤吹耳寒松釵飛入小欄干  
從今始覺

陶弘景自樂此聲泉石間

松濤

松聲翻作海濤喧入耳清音政不煩澎湃有時  
搖我夢一團和氣判胚渾

蔓徑

巉崑石徑草茸茸芟却荆蔓護却松客至將迎  
今已久滿山風雨蘚髻鬆

松絡

有石峩嵒千萬丈有松植牙三百尺劒戟攢天  
磨碧雲鬢鬚長此青絲絡織女初洗金繭絲晒



此蒼壁枯松枝乃命蜚廉轉縲車縲車無聲漫  
相緇織女下顧憂彼猖怒授和雲拋澗傍涓涓  
澗水更練洗淡碧可織雲錦裳英靈如或相憫  
我惠我一兩應不妨

綠檜

庭前綠檜叅天長骨節老大剛不偻直幹堅確  
凌雪霜翠蓋婆娑受風雨體備松栢不隨俗氣  
舍芝朮清香馥人間六月煩蒸時喜聽葉底風  
瑟瑟歲寒相對志不諂庭雪沒腰勢愈儼君不  
見孔老家庭手親植芳馨與爾終不掩

長亭柳 代人

長亭柳長亭柳長亭柳色青於衫送人南浦情  
何堪依依落日峯頭啣我在黃茅數間屋君駕  
滄波千里帆柳絲糾結正銷魂牽衣借問底時  
挽回轅年年天上一輪月十二回圓又缺塞上  
十二回圓時出門南望弛相思

葡萄架為風雨所敗

青青葡萄架鬱鬱庭前翠炎炎長夏日蔭我莓  
苔地植木以相扶攀緣葉垂次莖英何紛紛似  
罽青羅帔昨夜風雨狂狼藉相顛墜既折靠架



柱終然敗縈纍曉來憑軒窻愀然空一喟汝雖  
無補我頗有稱吾意赤日行長空酷熱難可避  
賴爾下侯旬盤桓謾徙倚而今委青泥萎薈豈  
天意炎月汗翻漿暑氣融如燹有詩何處吟却  
被蜚廉戲

嶺上老松

歲寒百草彫零後只有嶺上松獨秀幹排風雨  
老逾壯根盤石上偃不仆臃腫不中繩與墨竒  
怪恰受鬼神祐君不見春前桃李競嬋妍不日  
又被春風瘦紫鱗慘裂襯莓苔大枝輪囷知汝

壽

落葉二十韻

千巖風力緊落葉滿山蹊細細藏苔點飄飄逐  
馬蹄雨餘聲更速霜老色仍黧木末巢空掛林  
梢烏夜啼打簾醒蝶夢墜砌沒蘭畦聞雀枝邊  
亂驚鴻月下迷茶鐺親自燒詩句懶曾題淤赤  
明林壑盈堆填小梯閑庭聚復散淺甃掃還齊  
藪藪疑疑響騷騷怕鳥棲旋枯焦晚景速朽浣  
塘泥隔樹尖峯露垂條脆果低庭虛多受月軒  
豁剩臨溪浪吠訶山犬狂嘒喝野雞輕隨踈影



竹雜和亂鳴。蟬入戶。虫絲掛飛簷。蛛網締星河。  
昭耿耿。雲物淡淒淒。薄暮砧初動。晴空鴈已嘶。  
衣寒愁遠戍。刁冷怨深閨。絢紅殘照映。片片翼  
階西。

題盆中松竹

霜筠竒石萬年松。栽培瓦盆興味醲。勁節本來  
非俗態。寒枝從古助談鋒。看之不盡咏之足。伴  
以無心詩。以供翠竹嶺松。皆實相。儵然相對絕  
形容。

花草

看花

看花終日獨躑躅庭草毵毵午景遲天上豈無  
治老藥人間不見措床龜年光鼎鼎如流水世  
味紛紛似亂絲花底直須催喚酒不妨連日醉  
扶持

四季一朶始開

一點臙脂惱殺人含羞半掩自精神若教解語  
應傾國不獨西施與太真

花狼籍

花狼籍甚可憐一陣狂風何大顛點着綠苔猶



慰我莫教泥滓更潸然  
霏霏紅雨萬點香綠陰  
庭院人斷腸君不見長  
信宮中失寵姬玉顏寂  
寞為誰媚花落更發明  
年枝一棄永巷無出期  
敗蓼花

冷落殘花不自由  
扶踈相映荻花洲  
微茫水國無人見  
葺却漁翁繫釣舟

嘲菊二首

幽香正色傲繁霜  
節操可栽君子堂  
一事清標堪太惜  
貪生至死不曾僵

史魚置屍操心直  
伍胥乘潮結恨雄  
不識先生

那事在含香到死戀殘叢

羨菊二首

衆芳妍處獨無華萬木摧時始吐葩一種情懷  
人不識小梅零落蕙紛拏  
花褪清香也可人秋風老後更精神落英堪入  
三閭餐寂寞寒姿不借春

紫芝

誰向山中覓紫芝蒼苔白石路逶迤留侯一喚  
無人採風雨年年秀幾枝

芭蕉



一種春心寫綠羅春心續續倒抽多展了無語  
斜窻外踈雨時時替說多

庭草

庭草毵毵夏日長高低簷影過東墻酒因多病  
經旬止書值窮愁累帙藏蘇晉逃禪齋綉佛管  
寧浮海坐藜床放曠謹敕俱埋沒鬼錄空留紙  
半張

萱草

萱草可忘憂言樹堂之背呀然黃鵠觜婀娜端  
可愛誰道兒女花綠莖多氣槩勁直不隨俗色

正坤裳吉却恨不與年華競朝映書窓暮萎蕤  
瀑布書院賞海棠

自恠我為海棠崇朝暮踟躕不得解綠葉點紅  
惱殺人縱有千金可能買我曹自是個儻徒每  
向花前期醉罷不吝千金五花馬徃徃俗士呼  
為駭今見花仙書院中妖冶風流兩瀟灑不待  
撲鼻清香來也使騷人欣曳躑躅精神全在半開  
時只恐明朝風雨擺

芍藥

落盡翻堦芍藥花隨風片片撲窓紗邀蜂引蝶



暫時事泣把殘紅空自嗟

雨打棠花

滿山風雨打棠花  
流水前溪着水涯  
泛出洞門殊不惡  
恐將漏洩有仙家

月花

滿庭香氣正氤氳  
嫋嫋風流態度均  
名借姮娥良有以  
還疑天上有前身

萱花

庭院日長無事家  
一雙鵲背向人呀  
知渠定是忘憂物  
不競東風桃李花

青蓮

山中有菜莖葉如荷而無花僧呼爲青蓮

有荷生山間田田唯葉耳玉柄搖風前翠蓋翻  
雨裏露滴瀉明珠清香聞可喜雖無的皜葩自  
有亭亭翠雖無潏灩波自有龜遊戲不艷亦不  
俗濯濯又無累可以比君子德備無繁華君不  
見鏡湖三百里菡萏嬌如霞西施一笑折觀者  
盈若耶又不見太液千葉蓮綽約如仙女唐皇  
一遊翫恨不如解語媚者惑之漸羨者譏之源  
那知兩相忘不預人騰喧悄悄幽谷中泛泛清  
香薄一段綠羅張堪製幽人服



海棠

空谷佳人睡正長  
多情惱客倚新粧  
無香莫道尋常看  
著得香來爭斷腸

芍藥

深山五月草樹繁  
紅藥當階映小軒  
軟玉淡紅俱不俗  
偷香蛺蝶正銷魂

木蓮

山中有樹葉如柿花如白蓮而房如蒼耳子而實紅僧呼為木蓮

以爾為蓮葉如柿  
以爾為柿花如蓮  
綠葉堪作鄭虔紙  
玉葩可比姑射仙  
風來裊裊素羽搖  
月下獨伴姮娥眠  
清香舟舟襲人衣  
綽約仙子來

翩躚玉皇謫汝深山中不脫水雲袍幾年腸斷  
山風捲地時縞巾零落清溪邊我欲收拾作衣  
裳服之洞天雲水鄉夷猶玉井太華巔有時騎  
下初平羊

瑞香花

巧綴纈苞色淺深芳馨馥馥出雲岑紫蕤恰似  
丁香樹濃韻勝於簷蔔林禪派別傳匡阜頂清  
芬占斷洞庭心我有殊友千株在何用招呼苦  
遠尋

菜花



菜花嬌映晝繁朵透疎籬一夜風和肉炎去不  
暫時

白菊二首

自憐貞白歲寒芳栽培瓦盆置小床丹桂素梅  
兄與弟不同穠棣妬年光  
蕭疎枯葉附寒英輕帶寒霜四五莖終日對君  
無俗態香魂終不讓瓊瓊

紅蓼

庭前叢蓼兩三株雨葉風花揔可圖寒蘂倒垂  
紅欲滴繁枝偃亞綠相扶曾開渺渺三湘水開

映蕭蕭兩岸蘆盡日卧看清興在還如烟渚伴  
眠鳧

東牆下作小圃種草七八叢八首

苜蓿隨漢使來種東漢宮盤上長闌干羨栽搖  
光風東西風土異未辨真贗形名字世相傳好  
古栽前庭

山藥補虛羸佳味頗勝芋扶蔓托枯株團實不  
知數山中無異饌煑堀度朝暮明年托根肥斲  
之移後圃敷榮落子繁足以充貧窶

山薊可長生服之益已速願令辰共齡須學正



年法劉商昔餌此遐舉登寥廓元和得仙印揭  
名掛仙籙嫩芽可茹羹香根劑為藥塵骨若可  
換周流遊八極

黃精掃白髮改此塵凡骨根蟠墻下土綠葉搖  
輒砌八月九月時纒纒垂紺實汝稟大陽精壽  
我斯民速我種遺世人大濟蜉蝣域然後快於  
心知汝延年藥

當歸在山澗莖肥盈一掬春山雪初泮紫苗和  
泥拆可茹可為茹香甘味新足我昔在深山折  
鏹和雲烹勻調脫粟飯絕勝羅浮羹

子薑彊我者禦我寒邪氣到老性愈辣啗之壯  
腸胃仲尼亦不撒菜中真重味柔茅嫩帶紫肥  
根帶深白子野顧何人厭進蔬飯喫

萱草可忘憂言樹之堂背榮敷戒勿剪固非兒  
女態世上多少人紛紛憂且憤造化毓斯物滯  
胸令擘碎豈徒解人愁花開黃鵠嘴

紅蓼脩且長離離紅穗好我昔遊南國秋風吹  
江隩搖搖映寒葦簇簇明漁村對此起秋思峭  
絕難為言愛爾占西風種之名花墩

高中樞初種園花不知所以養



高公園裏集花石語我花園養花法君曾花譜  
見也未不見且聽看花格長春只在秀而繁莫  
似茄莖為樸檄梅幹夭矯老且神莫似村桑謾  
拗曲老松槎牙勢自然嶺上受風剛且縮假山  
嵌巖勢逼真崆峒三茅烟靄足玲瓏拳石意無  
窮坐對仙山千萬疊淨掃庭除列瓷盆鷓行仙  
侶朝天閣雨霽風微春日暄雄蜂雌蝶飛而喧  
衙罷歸來試一看足慰役役勞生魂

白菊

玉肌無粟倚東墻耐却深秋半夜霜已與寒梅

不共艷肯同穠  
李作新粧冰姿可見  
風前態清  
韻宜聞月下香  
却似廣寒宮裏女  
青鸞背上奏霓裳

深黃菊

玉露團團秋色涼  
金風拆盡數條黃  
落英曾入靈均餐  
盈把已浮彭澤觴  
宮女試裁金寶鈿  
仙娥新染道衣裳  
風流莫作春芳看  
到死抱枝戀舊香

淺紅菊

姑射仙人淡抹脂  
瓊樓乍倚脫丹頤  
不同肌骨



越溪女肯似無雙江夏兒  
向曉謫仙初頰面凌  
寒孫壽作愁眉只堪長伴陶元亮  
相對頽然酹  
酌時

折葦

折葦霜粘不自由  
大枝獵獵小枝柔  
不是摧殘驚起鴈也應傷  
壓穩眠鷗霜乾雨戰聲聲  
苦日炙風敲个个愁  
十年曾作江湖客  
厭聽騷騷半夜秋

梅花

一枝二枝花信拂  
三點五點先破萼  
霜前月下

更清絕踏雪幽尋也不俗我昔苦被詩情惱杖  
藜扶我溪橋路老枝蟠糾小枝斜雪骨冰姿多  
態度淡淡清香撲鼻來烟水蒼蒼斜日暮對此  
徘徊不忍別翠羽喇嘈山月白

牡丹

君不見沈香亭前妖木攢楊家貯之百寶欄吉  
祥寺裏錦千堆蘇子比之瑪瑙盤國色天香古  
所嘆桃李無顏方始看粧鏡臺前玉真醉翠錦  
幄中西施戲十分嬌艷噴晴香可堪喚作花中  
王却恐明朝花易老春風擺盡紅羅裳



芭蕉

東君剪刻 胚渾研朱點白嬌滿園萬般妖艷  
盡嬋娟爭妍竟妬偏承恩脈脈無言抱怨深故  
遣芭蕉訴帝閣一封奏章題綠羅寫盡千古長  
嚼冤半夜展開風雨戰繁敲亂打芳心顫東風  
畢竟無情思一朝拆盡分明爾

海棠花

曉天煙露飾凝粧剩許臙脂著海棠耽睡不知  
春酒醒無香爭解蜜蜂狂正宜細雨勻含淚莫  
被斜風暗斷腸到得半開多意緒太真嬌笑侍

明皇

榴花

安石何年別來從萬里天丹葩疑噴火綠葉暗  
生煙不與艷陽妬似共殘照妍絳囊誰半蹙點  
綴一叢顛

麗春花

千苞的皜小園東天遣司花別致工不如米囊  
偏有種肯同紅藥謾多叢腰纖可笑嬌無力命  
薄堪嗟色是空日暮扶頭誰得似麗華中酒倚  
春風



金錢花二首

舉世滔滔競戰爭紛紛悵惜孔方兄  
若教此物堪藏貯應被權豪盡奪并

巧製由來造化功風磨雨鍊色玲瓏  
為君煩著錢神論恐說花神製作工

蓮房

何事濂溪獨愛焉亭亭淨植似羣仙  
無端又有花方果堪譬金人說妙蓮

野草

野草不知名東風吹又生蒙茸迷小徑  
葱蒨繞

長程別浦傷春意池塘得句情萋萋和細靄綠  
縲礙人行

懶治花塢

老夫平生盥櫛了但把經史事研討竟日不知  
光景過以此一生欲終老疇昔悠悠正無賴城  
市山林置花草積石為甃築花塢年年鋤治又  
淨掃邇來無復事勤劬新枝盤鬱舊枝槁從茲  
不復理繁蕪好事不如無事好君不見陳公宅  
庭多糞穢周子窻前草菊翳古來賢哲各有計  
吾何苦欲治瑣細盤根錯節當奮袂



梅月堂詩集卷之五







